

四庫全書薈要·乾隆御覽本

集部

御定歷代賦彙卷一百十六

草木

桐賦

宋

袁淑

越衆木之薰徇勝雜樹之藻縟信爽幹以弱枝實裏素
而表綠若乃根莢條茂跡曠心冲負觀於曾山之陽抽
景於少澤之東被籍兮煙霞懷珮兮星虹儀丹丘之瑞
羽棲清都之仙宮

梧桐賦

齊蕭子良

植倚桐於廣園嗟儵忽而成林依層楹而吐秀臨平臺而結陰乃抽葉而露始亦結實於星沈聳輕條而麗景涵清風而散音發雅詠於攸音流素賞之在今必鸞鳳而後集何燕雀之能臨匪伊楚宮側豈獨嶧山岑邈蒿萊之難儷永配道于仙琴

桐樹賦應竟陵王教

梁

王融

梧桐生矣於邱岫之曾隈儀龍門而插幹佇鳳羽以抽

枝蹤楚宮而留稱藉溜館以翻聲直不繩而特秀圓匪
規而天成同歲草以姜暮共辰物而滋榮豈遠心以自
外寧有志於孤貞

桐賦

梁
沈約

龍門之桐遠望青蔥專巖擅嶺或孤或叢枝封暮雪葉
映晝虹抗蘭橈以栖龍拂雕牕而溥露喧密葉於鳳晨
宿高枝於鷺暮合影陽崖標峰東陸俯結玄陰仰成翠
屋乍髣髴於行雨時徘徊於丹轂遠齊綵於碧林豈慙

光於若木

尚書省梧桐賦

以託根得地藏
器待特為韻

唐

崔

鎮

惟皇立極建都河洛會府䟽庭珍木咸若偉梧桐之嘉
遇竟因人以勝託傾鳳翼於朝陽偶鶴行於秘閣貴有
常尊靜為躁君花繁翼子幹直謀孫履素至潔體柔常
存揭日月以曜穎含雨露以流根豈與夫龍門半死嶧
陽孤植齊萬籟而混吹合千巖以共色勁質冰摧而籽
人莫識高標風折為樵人所得求知音於爨爨論分理

於絕墨且問之以死生又焉議夫通塞故至人以全身
遠害君子以自強不息夫其理山林不足以攝生順其
道朝市何妨乎育德梧桐生矣自遠而至輕去無何之
鄉不居有過之地謂繁華兮國人服媚吾獨後春而翠
謂搖落兮物情共棄吾亦先秋以悴不改節以邀利不
立名而自不必居常以待終將百慮而一致大年椿榦
捐雲豫章之籍貞勁桂椒信芳百果甲拆於金谷千林
花發於河陽實繁者皆圻材用者先亡我異於是于何

不減布清陰於仙署樓白雲於帝鄉旁連杞梓俯接琳
瑯蔚金蟬之氣色耀錦帳之輝光我封我樹無臭無香
後天年於社稷用當代於甘棠得喪齊致語默兩忘吾
不知夫支離之德何獨獲而自出遽瑗之智何獨卷而
自藏復有剪刻為圭琢磨成器龍章鳳軫金符玉瑞平
君子之心戒王者之戲晉侯得之諸侯麋至子野得之
玄鶴來賢雖信美於疇日未若茲辰之佩仁履義我求
懿德於是乎在䟽相比遠相待以其景征成而不宰譬

諸草木生植有時除惡務本樹善務滋引之斯至權之
斯離角弓兮有什杖杜兮陳詩敢告在位如何不思念
茲在茲庶事順施苟求夏陰與秋實無拔揚以樹茨

槐賦 有序

魏文帝

文昌殿中槐樹盛暑之時余數遊其下美而賦之王粲
直登賢門小閣外亦有槐樹乃就使賦曰

有大邦之美樹惟令質之可佳託靈根於豐壤被日月
之光華周長廊而開趾夾通門而駢羅承文昌之邃宇

望迎風之曲阿脩榦紛其瓊錯綠葉萋而重陰上幽藹
而雲覆下莖立而擢心伊暮春之既替即首夏之初期
鴻鴈遊而送節凱風翔而迎時天清和而溫潤氣恬澹
以安治違隆暑而適體誰謂此之不怡

槐賦

魏
曹植

羨良木之華麗爰獲貴於至尊馮文昌之華殿森列峙
乎端門觀朱棖以振條據文陛而結根暢沉陰以溥覆
似明后之垂恩在季春以初茂踐朱夏而乃繁覆陽精

之矣景散流耀以增鮮

槐賦

魏
王粲

惟中唐之奇樹稟天然之淑姿超疇畝而登殖作階庭
之華暉形禕褱以條暢色采采而鮮明豐茂葉之幽藹
履中夏而敷榮既立本於殿省植根柢其宏深鳥願栖
而投翼人望庇而披襟

槐賦

晉
摯虞

覽坤元之產植莫茲槐之為貴爰表庭而樹門膺論道

而正位爾乃觀其誕狀察其攸居豐融湛霽翁鬱扶踈
上拂華宇下臨脩渠湊以夷徑帶以通衢樂雙遊之黃
鵠嘉別摯之王睢春棲教農之鳥夏憇霑哺之鳥若夫
龍升南陸火集正陽恢茲鬱陶靜暑無方鼓柯命風振
葉致涼開明過於八閩兮重陰踰乎九房

大槐賦

有序

晉
庾 儵

余去許都將歸洛京舍於嵩岳之下而植斯樹焉遂作
賦曰

有殊世之奇樹生中岳之重阿承蒼昊之純氣吸后土

之柔嘉若夫赤松王喬馮夷之倫逍遙茂蔭濯纓其濱

望輕霞而增舉垂高暢之清塵若其含真抱朴曠世所

希降夏后之卑室作唐虞之茅茨潔昭儉以矯奢成三

王之懿資故能著英聲於來世超羣侶而垂暉仰瞻重

幹俯察其陰逸葉橫被流枝蕭森下覆靈沼上蔽高岑

孤鶻徘徊寡鶴悲吟清風時至惻愴傷心將騁軌以輕

運安久留而涕淫

庭椿賦

元 任士林

燕山之陽南冥之濱有大木焉其名曰椿蓋抗歲時而
聳立揭造化之躑躅者與相彼竒亭夷庚掌平迺睠筮
村薨椽列星維陋巷之蕭蕭兀幽人之柴局有椿喬然
闕乎中庭玄雲構其堂宇秀色結乎軒楹觀其宗根碩
本挺柯稠葉翁翁焉萼萼焉青冥黯黯皮溜雨而胼胝
榦拂霓而冗逯簞日月之氛陰控雪霜之飄颻千尋引
而表端萬鳥棲而影接蓋根柢之擁腫性也豈不美乎

莊生之襟枝葉之榮暢時也又何歌乎王氏之槐耶盼
老人之豫章訪歲寒之松柏或輪囷以為竒或偃蹇以
為傑孰與夫謝萬牛而崔嵬却匠石而鬱芘者乎岡則
稚竹株連弱松肺附結緒根於地軸藉沫濡於雨露想
其簇幹聳幪列萬間之厦屋不足以喻宗條鱗鱗雖千
社之粉榆又何足以同年而語耶於是天翔其貞地隆
其植寒暑節其涼溫鬼神呵其峻特醴泉夜注而人不
能挹以草木之滋卿雲晨覆而人不能衣以青黃朱綠

之絲人不足以扶持而終風不移人不足以悅懌而陽
春色怡此所以俯視君遠傲睨平伸而永為斯庭之瞻
依也耶彼尋常之喬梓亦何足以與乎斯

忘憂館柳賦

漢枚乘

忘憂之館垂條之木枝逶遲而含紫葉萋萋而吐綠出
入風雲去來羽旌既上下而好音亦黃衣而絳足蜩蟬
厲響蜘蛛吐絲階草漠漠白日遲遲於嗟細柳流亂輕
絲君王淵穆其度御羣英而翫之小臣瞽瞍與此陳詞

於嗟樂兮於是罇盈縹玉之酒爵獻金漿之醪庶羞千
族盈滿六庖弱絃清管與風霜而共雕鎗鏗啾唧蕭條
寂寥儻又英髦列襟朕袍小臣莫效於鴻毛空銜鮮而
嗽醪雖復河清海竭終無增景於邊徼

柳賦

魏文帝

昔建安五年上與袁紹戰於官渡時余始植斯柳自彼
迄今十有五載矣感物傷懷乃作斯賦曰

伊中域之偉木兮瑰姿妙其可珍稟靈祇之篤施兮與

造化乎相因四氣邁而代運兮去冬節而涉春彼庶卉
之未動兮固肇萌而先辰盛德遷而南移兮星鳥正而
司分應隆時而繁育兮揚翠葉之青純脩榦偃蹇以虹
指兮柔條阿那而蛇伸上扶踈而施散兮下交錯而龍
鱗在余年之二七植斯柳乎中庭始圍寸而高尺今連
拱而九成嗟日月之逝邁忽疊疊以遄征昔周遊而處
此今倏忽而弗形感遺物而懷故俛惆悵以傷情於是
曜靈次乎鷄首兮景風扇而增暖豐宏陰而博覆兮躬

豈弟而弗倦駟馬望而傾蓋兮行旅仰而迴瞻秉至德
而不伐兮豈簡卑而擇賤含精靈而寄生兮保休體之
豐行惟尺斷而能植兮信永貞而可羨

柳賦

魏
王
粲

昔我君之定武致天屆而徂征元子從而撫軍植佳木
於茲庭歷春秋以踰紀行復出於斯鄉覽茲樹之豐茂
紛綺旒以脩長枝扶踈而單布莖森梢以奮揚人情感
於舊物心惆悵以增慮行游目而廣望觀城壘之故處

悟元正之話言信思難而存懼嘉甘棠之不伐畏取累
於此樹苟遠跡而退之豈駕馳而不屢

柳賦

魏
繁欽

有寄生之孤柳託余寢之南隅順肇陽以吐芽因春風
以揚敷交綠葉而重葩轉紛錯以扶踈鬱青青以暢茂
紛冉冉以陸離浸朝露之清泣暉華采之猗猗

楊柳賦

魏
應瑒

赴陽春之和節植纖柳以承涼攄豐節而廣布紛鬱勃

以敷陽三春修其奄過景日赫其垂光振橫條而遠翳
迴雲蓋於中唐

柳賦

晉傅玄

美允靈之鑠氣兮嘉木德之在春何茲柳之珍樹兮稟
二儀之清純受大角之禎祥兮生濛汜之遐濱參剛柔
而定體兮應中和以屈伸長莖舒而增茂兮密葉布而
重陰夾通塗與廣庭兮環清沼而成林於是玄雲被岳
素景含暉泰液渥流朝露未晞是精靈之所鍾兮蔚鬱

鬱以依依居者觀而弭思兮行者樂而忘歸夫其結根
建本則固於泰山蕙覆廣施則均於昊天雖尺斷而逾
滋兮配生生於自然無邦壤而不植兮象乾道之屢遷
紛猗靡以從風兮若將往而復旋若乃豐葩茂樹長枝
天天阿那四垂凱風振條同志來遊攜手逍遙

柳賦

晉

成公綏

宅京宇之西偏濱犢鼻之清渠啟橫門於大路臨九達
之通衢愍行旅之靡休樹雙柳於道隅彌年載而成陰

紛嬋媛而扶踈

西掖瑞柳賦

以應時呈祥聖德昭感為韻

唐

郭炯

乾坤至誠草木無情神靈乘化而致理枯朽效祥而發
生當聖澤未沾故兀然枯瘁及天光迴照遂藹爾敷榮
因萬物以咸遂與百祥而畢呈故得垂陰瑣闥之中固
本鳳池之側始孤標而穎拔乍苒弱而條直長充西掖
之佳翫迴奪東門之秀色芬敷自異永垂不朽之名變
化無常用表好生之德懿其萬生漸蔚幹聳惟條拂瑞

景而增麗，衰祥風而獨搖，可以彰聖主之立感，可以見
昊天之孔昭。舒卷以時，陋梧桐之半死；榮枯順理，鄙松
柏之後凋。且春布發生之慶，秋行肅殺之令。於天地而
不失其常在，金木而各得其性。衆皆畢出，盡達我則向
日而衰；衆皆黃落，萎靡我則感時而盛。不然，何以知至
德之動天，運神功而瑞聖者矣。翠色泔泔，異酒泉嘉柰
之祥；輕陰澹澹，同鄙郡枯梓之感。煙銷雨霽，霏素雪於
宸居；日晏春深，雜繁華於睿覽。青翠蕤垂，軒拂墀在。

日月偏臨之處當鴛鴦集苑之時至矣哉天降靈貺聖
為明證既得地而不雜衆流常託根而獨標美稱是知
天聽自人而應者也

西掖瑞柳賦

以應時呈祥聖
德昭感為韻

唐陳詡

柳美西掖瑞彰聖時感巡遊之未至失榮落於先期雨
露所均常比中園之鬱鬱宮闈暫閉若無春日之遲遲
所以望車塵之行幸慰都人之怨思物或有憑神固難
宰生植不易地而殊榮孤影忽同秋而異色豈上天之

降鑒俾下民之是則於以激忠臣之心於以彰大君之
德初斯柳之失常人未知其為祥秦原之煙景明媚漢
苑之草樹芬芳獨孤彫而槁瘁似永隔於風光無絮花
之似雪意膏露之凝霜及夫天迴舊步木得其性千官
捧日以輸忠萬騎從龍而翊聖彼衆芳之已歇我得秋
而始盛豈固異於常材實願貞乎景命偉夫瑞發匪遙
成天意之孔昭德惟可覽結人心之幽感不然柳且無
情曷枯而生其枯也當煙塵之晦其生也表氛沴之清

與時不偶叶聖斯呈政或可持疾風始知夫草勁節無
所立歲寒徒稱乎栢貞宜其俯鳳池而灑潤接雞樹以
連榮儒有因物比興屬詞揣稱聞瑞柳於春宮遂揄揚
於天應

柳賦

明
徐世溥

溪頭柳發江上春歸有美一人傷心緒絲閒行煙暮折
而賦之竊聞園中鬱鬱漢南依依章臺綠早薊北青遲
白門則啼鳥爭宿灞陵則班馬常嘶芳亭畔若耶水

西所以笛聲恨別瑟調傷離至如託根墀側移植殿頭

翠袍夾乎馳道青瑣垂乎邗溝深宮長樂別館忘憂吳

娃恒歎梁王每遊發枚乘之麗藻憶張緒之風流斯則

柳之榮遇也爾迺淵明荒宅叔夜山庭先生表姓中散

匿名暗度杖履之跡遙聞鍛瑟之聲斯則柳之高隱也

及夫軍屯細柳衛宿長楊旌存十萬羽獵輝光但識亞

夫鉅問劉郎叛兒以白花遁禍季跖以柳下稱強斯則

柳之武俠也若乃深藏朱戶淺映清池垂露光濕挂月

星稀暮春修禊枝滿門楣蟬抱柱而不脫魚驚緡而不
移樓上之素手遙出當爐之秀肩近齊弱舞楚國之腰
彎畫秦宮之眉隨風暫舉向人復低遂使情鍾美人心
悲蕩子夢繞大堤魂搖江汜嫋暮煙兮千條漾春光於
萬里不比拙於松柏詎爭妍乎桃李哉

柳花賦

晉

伍輯之

步江皋兮騁望感春柳之依依垂柯葉而雲布揚零花
而雪飛或風迴而遊薄或霧亂而颺零野淨穢而同降

物均色而齊明

楊花賦

宋

田錫

梁苑殘春垂楊映津枝黛染以交引葉眉纖而鬪伸落
絮如雪飄煙拂塵輕芳兮就月為魄澹白兮依風作神
當艷陽之美景過上巳之良辰其繁也六出之英未多
其豔也早梅之芳若何釋葉辭蒂流枝逗柯浮朝靄兮
散斜陽九重丹禁拂扁舟兮隨雨漿千里輕波是時孝
王多暇閑登水榭因悅柳之太柔嘗茲花兮似畫乃顧

郢枚憐其逸才命臨流兮就景陳綺席之金壘相如後
至居於右座欣麗藻之無敵若陽春之寡和衆賓目動
怯勝氣以潛消梁孝意怡禮竒才兮敢惰於是授以毫
牋言容懌然曰寡人多幸知子之賢願以文為樂也俟
當場而試焉且昔楊柳之詩古人有之揚花之賦作者
多非可以運精研之恩施絕妙之詞相如感主人之遇
援毫而賦盡華藻之菁英得飛花之態度以為漠漠霏
霏微風暖吹裊甘露於珠樹蕩朝陽於玉墀乍若吳王

江國水殿春曦梅花已老零落交飛矧又蕩然無羈紛
兮交錯入殘月之綺窓滿夕陽之畫閣乍如陳后失恩
長門寂寞梨花向晚繽紛散落有時金屋徘徊珠簾半
開胃繡牀之彩縷紫粉奩於玉臺乍若謝家深院寒景
相催暮雲方密飄飄四來至於湘浦幽深樾林蔥蒨滿
黃陵之古廟撲蒼山之晚殿乍如亂煙之下落泉飛練
噴嵐洒煙沫花相濺有時送客南遊垂楊渡頭未盡離
酒猶縻去舟思夕宿之江館望朝雲之水樓飄兮蕩白

紫觴惹愁和鷓鴣以連飛平波渺渺伴舳舻而已遠晚
景悠悠矧夫春院深嚴書帷闕寂橫南窓之綠綺委犀
書於湘帙冰濡相浥粘匣硯以難飛風聚成規滾砌莎
而可惜加之碧簾銀牀梧桐影涼春光餘幾艷景方長
當奕客以凝情飛來寶局值嘉賓之舉白吹過金觴有
時簾幕雨餘池塘風定凝去忽飛幽而可詠榆墜莢以
相先桃落花而互映餘態重重妍姿弗窮大約含愁於
夕靄惟憐委迹於流風值輕露以多掩傍微陽而即通

是知有以妖冶輕盈為貴者雖五彩之毫妍不可寫雖
數子之詞才難騁奇惟相如之善者致梁王之悅而乃
命左史記言而右史錄之藏之寶笥以為柳花之詞

枯楊生稊賦

以青春光
耀為韻

唐

敬括

柔得乎剛則變化無方故能令老者以安分使衰者而
再芳不然艾之均奚獨殊其棟橈木之衆奚獨舉其枯
楊徒觀其枝葉滋潤色帶韶光發枯槁擢豪芒直幹森
梢歛浮於青翠高柯偃蹇漸變於蒼黃豈比夫顛木貴

枿瓌材稱良而已哉至如和風稍吹遲日久照淡清煙
而暮虛合晚霽而凝耀苟非懷蠹狀雖死而猶生忽應
鳴禽類先號而後笑是知心動於內氣變於形以類相
感因時則冥或叢生落落或孤峙亭亭映平林而迥秀
倚長空而半青爰有翰林墨客懿此惟新覩物生興與
時為春在陽當榮於枯木理代實資於哲人遂稽大道
將期小伸相長揚以體物希百中於茲辰

國子丞廳連理樹賦

唐
王履貞

靈臺崇崇兮洞轆轤以縣延中有珍木兮鬱森森以芊
芊始殊形以分聳終共理而連拳始信德以被物初應
聖而效焉且學為教原丞為糾局生於學者表王化之
大同植於廳者知官政而無曲亦所以據於德而遠於
俗也樂我皇道彰我聖年謂為交柯乃尋本而無末謂
為別幹能已離而復連依君仁義之圃對君翰墨之筵
俾為我師者如斯木之一德為我曹者如斯木之相全
故瑞不虛然從化而止化不在遠行之由已有善必應

詎云草木之無知惟德是親奚問陰陽之至理可以載
美青史可以表慶皇家人各有心我則合而為一物曲
有利我則不避其斜夫如是則造化之理易尋天地之
情可測順之則生瑞逆之則成愆故曰禍淫涵福正直
諒物情之效祥由人君之布德故得托根講肄之宇垂
陰夫子之墻雜庭槐以為列偶仙杏而成行逢聖而生
匪由乎日月以翼取端為寶孰尚夫金玉其相所謂光
乎泰階允臻靈貺不然者則徒聞其說孰究其狀至矣

哉觀一樹之攸同知四夷之內向

連理樹賦

唐

陳諷

惟薰風之生物有穠李之表禎合連枝於異幹符一姓
於嘉名交影齊密均和共榮諒全德之通感豈元和之
曲成族堅附離訝生植之異氣殊質合體識天地之幽
清考彼祥經珍茲善價昭一人之有慶表四夷之嚮化
體符通理黃中之象攸存義用成蹊不言之道斯備蓋
夫靈根得地聳質齊芳分條表異合幹呈祥膚含玉潤

文蔚龍章靈交翼比影附枝強庇本根於仙族挺孤秀
於仁鄉始則分形謂陰陽之偶數終而一貫表遐邇之
通方是知立本靈種暗符神用諒翦伐之為重合拱連
條允乎歌謠固耳目之所昭並甘棠而價掩比叢桂之
香遙則知瑞以感生祥由仁致覩政分而脉會契人事
與天意將德茂而精通故駢踈而合異於以昭化警俗
示人不二豈比夫草生堯砌空有紀於歷官芝產漢宮
徒用彰於祀事洎夫玄律發春東風薦臻齊敷連芳之

影共沐陽和之津想雙枝於棠棣感合體於君臣四海
為家豈必移根於上苑五色敬用固亦發瑞於仁人彼
晉得華林漢生廣殿諒崇功而間出豈謙德而來見願
棲託之見容恐光陰之不薦

李樹連理賦

有序

唐
潘炎

帝在上黨延唐寺有李樹連理上親視焉賦曰
惟彼嘉樹列星之精耀本扶踈當元光之降誕盤根連
理應我后之文明天之發祥豈無他木必曰茲樹是光

皇族所以並脩幹連高枝青房表異朱仲稱竒察以休
微不假終軍之識同於樹德寧為簡主之知族茂宗榮
盤根合理花之發也霰每亂於青春實之繁兮珠更深
於寒水豈徒生於靈井植彼東園自感義以相待但成
蹊而不言此乃興聖主之符表天家之姓一人親覩六
合稱慶至若鍾山之寶玉井之仙或正冠而垂訓或投
贈以成篇比德於我彼何有焉臣炎作賦天子萬年

大榕賦

宋

薛士隆

越甌而南嶺山東麓有七閩之會焉厥都維福福都中
閩城山塹水修遠孔直麗譙南指粵有喬木根乎此堂

青蔥映帶經五門而之合江夾經途者凡十有五里其
為根也盤桓詰曲勢浮平陸隱丘陵幹坤軸如山如坻
峯岑蔽虧列岫竒峯幻然然為蜿蜒糾紛地蟠鹿奔卷
舒連蜷油如出雲樹無全株萬本同植縈連擁腫鑽堅
露隙儔引儔緣自陵空碧和氣鬱贅疣生衆醜脩百怪
形岌如神山冬無落木蒼蒼九夏森其翠幄枝柯離披

橫從出奇翕如其合判如其離嗟如其往歎如其來天
矯驪龍摩天切空雕翼雲垂扶搖下風輪囷無心隨之
有本孔綜根元誰分混沌軒然而大廈成蚴然而怪螭
怒駢爪紛拏轟其八柱飛鳥千羣而咸棲有所綢繆束
薪不堪以火盤根錯節而摧斤缺斧其圓也不中乎規
不成乎矩樵夫視而弗斫大匠行而弗顧以無堪而保
其天斯所以過乎人而壽莫之斂也若夫景升之牛主
人之鴈不善其鳴服箱孔屯以不才而烹者何哉蓋豐

肌而蠹夫人之芻豢也斯榕木則不然承天之施得生
於地不假乎人不離乎類不以直節為高不以孤生為
異凌寒而不改其操連理而不稱其瑞無庸而庸無尚
焉為其全虛愚之義也至於交柯旁薄分根合枝異生
同命縈繚相維倚天成蓋蔽野成帷迷雲而零雨不下
畏日而炎天改色邑人之依行人之得不才而才無似
焉斯其為大通之德也夫惟有大通之德全虛愚之義
守不才之位處無庸之地為物而物固莫之陵比人而

人適當其意其事也無施其生乃克遂是生乎通邑大
都之間尚亦躡千齡而幾萬歲也走嘗聞諸西方之人
曰尼俱律陀之木其子芥三之一及其成材蔭車將五
百乘斯榕木者不幾於是乎今夫閩中之木榕為大其
萌也微物莫之害有蠹其芽翁然天蓋走不知命之者
誰耶庸以劣其形而不文其內無文於內將或容於外
而以成其大

榕木賦

有序

宋

李綱

閩廣之間多榕木其材大而無用然枝葉扶踈比蔭數
畝清陰人實賴之故得不為斧斤之所翦伐蓋所謂無
用之用也感而為之賦其辭曰

南有巨木其名曰榕下蟠據於厚地上盪摩於高穹雨
露之所濡潤雷霆之所震聳日月之所照燭乾坤之所
含容與衆木均夫何賦形稟氣之獨不同也爾其擢幹
數條輪囷離竒結根植本拳曲擁腫口鼻百圍之竅穴
龍蛇千尺而飛動仰視俯察何規矩繩墨之不中也高

明之麗非棟梁之資斲削之工非俎豆之奉以為舟楫
則速沉以為棺槨則速腐以為門戶則液以為楹柱則
蠹薪之弗焰無燹鼎之功燎之弗明無燭火之用蓋朽
然之散木徒萬牛之嗟重宜匠石之不顧同櫟社而見
夢然而修枝翼布密葉雲濃比結駟之千乘象青蓋之
童童夏日方永畏景馳空垂一方之美蔭采萬里之清
風靚如帷幄肅如房櫳為行人之所依歸咸休影乎其
中故能不夭斧斤楛擘是免雖不材而無用乃用大而

效顯異文本之必折類甘棠之勿翦立乎無何有之鄉
配靈椿而獨遠不然則鴈以不鳴而烹漆以有用而割
犀象以齒角而斃樗櫟以惡木而伐處夫材與不材之
間殆未易議其優劣也

古楠賦

有序

宋

宗澤

巴城之南山有寺曰南龕寺之外有大木曰楠其生甚
久唐刺史嚴武御史史俊皆有詩訶刻於巖腹嚴曰臨
溪挿石盤老根史曰結根幽壑不知歲自時迄今又數

百年邦人謂之古楠宜矣僕到官之三月兩至巖下讀
史巖之清什感是楠之老於巖谷而可憐也因慨然操
筆而賦之曰

楠之生兮層崖之中巔詢之人兮不知幾何年也堅根
而下蟠兮貫頑石而澈沈淵竦脩幹以上凌兮並孤岑
而參蒼天大枝崛起兮虎豹挾攫小枝回屈兮蛟螭蜿
蜒黃葉敷陰白晝沉沉輪廣十畝蓋窮百尋衆鳥托宿
鄧林非深諸卉仰比荆雲非陰雨濯瑩兮一塵不染風

振響兮海潮同音露下兮鶴唳月明兮猿吟擅此清致
亘古迄今有客戾止惻然動中吁嗟斯木之異兮有不
遇之窮爾胡不生於泰山之側秦帝東封會風雨之是
避豈以五大夫之號而封松爾胡不生於周成之宮禁
林九重顧親賢之是戲豈以封國之瑞而翦桐爾胡不
生於分陝之域舍彼召公未必以甘棠之蔽芾流詠於
國風抑亦豈無工師之良識爾材之非常用之為棟梁
則足以建九重之明堂用之為舟楫則足以濟巨川之


汪洋用為宗廟社稷之器則足以泰鼎為交神明薦至
德之馨香夫何默默而甘老於窮山寂寞之鄉徘徊其
下恍若夢兮心駭而目眙蒼髯偉人瞋目視曰噫謂子
知我乃不吾知吾生於斯長於斯始於毫末至於十圍
雨露不吾遺霜雪不吾欺春兮秋兮吾不知代謝之有
期漢兮唐兮吾不知興亡之幾時柯葉顏色曾無改移
過者千百睥睨焉不以吾為樸樛輩待之斧斤之害亦
幸不罹吾受天地造化之恩孰有等夷子之不智而乃

我悲使子處此復將奚為吾非不知強自取藏器以待時而動老當益壯自任以天下之重儻匠人斲而小之能不澆然而悔痛乃所願比不材之樗同乎無所用若曰不過自有物主之非吾所能為姑亦付之一夢客聞之釋然悟曰達矣夫斯言可書紳而誦誦

御定歷代賦彙卷一百十六

謹案卷一百十五第七頁後八行訪孔公之舊宅
刊本公訛子據李衛公別集改

第八頁前二行其柯肅肅自比于真松按李衛公
別集自作可



欽定四庫全書

總校官庶吉士臣張能照
校對官編修臣周厚轅
謄錄監生臣沈東昇

欽定四庫全書薈要

集部

御定歷代賦彙卷一百十七

詳校官候補通等歷代臣郭祚熾



御定歷代賦彙卷一百十七

草木

文木賦

漢

中山王

離披

離披生彼高崖拂天河而布葉橫日路而擢枝幼

雛羸駁單雄寡雌紛紜翔集嘈噉嗷鳴啼載重雪而稍勁
風將等歲於二儀巧匠不識王子見知乃命班爾載斧
伐斯隱若天崩豁如地裂花葉紛披條枚摧折既剝既

刊見其文章或如龍盤虎踞復似鸞集鳳翔青綃紫綬
環壁珪璋重山累嶂連波疊浪奔電屯雲薄霧濃霽麕
宗驥旅雞族雉羣蠋繡菴錦蓮藻艾文色比金而有裕
質參玉而無分裁為用器曲直舒卷脩竹映池高松植
嶽制為樂器婉轉蟠紆鳳將九子龍藻五駒制為屏風
鬱第穹隆制為杖几極麗窮美制為枕案文章璀璨彪
炳渙汗製為盤盃采玩踟躕猗歟君子其樂只且

長生樹賦

有序

晉

嵇含

余嬰丁閔凶靡所定居老母垂聖善之訓以為生事愛
敬沒則無改宜居墓次瞻奉威靈兼覽藝文可以不隕
先軌祇奉慈令遂家於墳左埽除壇封種植松柏松柏
之下不滋非類之草猥有長生育於域內豈老母至行
表徵於嘉木哉

美我親之仁孝固徵瑞之必招降祖宗之遺德振奇木
之青條結根擢幹載生無漸弱莖猗猗綠葉冉冉處陰
冬而愈茂豈莖葉之有點感自然以旌賢諒有道之不

掩

拼櫚賦

宋
劉敞

圓方相摩純粹精兮剛健專直交神靈兮馮翼正性拼
櫚榮兮中立不倚何亭亭兮受命自天非曲成兮外無
附枝匪其旁兮密葉森森劍戟銜兮溫潤可親廉而不
傷兮雪霜青青不界僵兮壽比南山邈其無疆兮被髮
文身何佯狂兮沐雨櫛風寒無所妨兮苦身克已用不
失職兮摩頂至踵尚禹墨兮黃中通理類有得兮屹如

承天孔武且力兮慄其無華不尚色兮表英衆木如繩
墨兮播素蠻夷反自匿兮邈世無悶曷幽嘿兮明告君
子吾將以為則兮

木蘭賦

有序

晉成公綏

許昌西園中木蘭樹余往觀之遂為賦曰

覽衆樹之列植嘉木蘭之殊觀至於玄冥授節猛寒嚴
烈莪莪堅冰霏霏白雪木應霜而枯零草隨風而摧折
顧青翠之茂葉繁綺旒之弱條諒抗節而矯特獨滋茂

而不彫

木蘭賦 有序

唐 李華

華容石門山有木蘭樹鄉人不識伐以為薪餘一本方
 操柯未下縣令李韶行春見之息馬其陰喟然歎曰功
 列桐君之書名載騷人之詞生於遐深委於薪燎天地
 之產珍物將焉用之爰戒虞衡禁其翦伐按本草木蘭
 似桂而香去風熱明耳目在木部上篇乃採斫而歸理
 疾多驗由是遠近從而採之幹剖枝分殆枯槁矣士之

生世出處語默難乎哉韶余之從子也嘗為余言感而為賦云

泝長江以遐覽愛楚山之寂寥山有嘉樹兮名木蘭鬱
森森以茗茗當聖政之文明降元和於九霄更稜沴之
為虐貫霜雪而不凋白波潤其根抵玄雪暢其枝條沐
春雨之濯濯鳴秋風以蕭蕭素膚紫肌綠葉紺蒂踈密
聳附高卑蔭蔽華如霜雪實若星麗節勁松竹香濃蘭
桂宜不植於人間聊獨立於天際徒翳蒼兮為鄰挺堅

芳兮此身嘉名列於道書墜露飲乎騷人至若靈山霧
歇藹藹林樾當楚澤之晨霞映洞庭之夜月發清明於
視聽洗煩濁於心骨韻衆壑之空峒澹微雲之滅沒露
草白兮山淒淒鶴既唳兮猿復啼宵深林以冥冥覆百
仞之玄谿彼逸人兮有所思戀芳陰兮步遲遲悵幽獨
兮人莫知懷馨香兮將為誰惋樵夫之無惠混衆木而
皆盡指畫類而揮斤遇仁人之不忍方甘心而勦絕俄
固抵於傾殞憐春華而寡芳顧落日而迴軫達者有言

巧勞智憂養命蠲疫人胡不求枝殘體剝澤盡枯留顛
顛空山離披素秋鳥避弋而高翔魚畏網而深遊不材
則終其天年能鳴則免於俎羞美此木之不終獨隱見
而罹憂自昔淪芳於朝市墜實於林丘徒鬱咽而無聲
可勝言而計籌者哉吾聞曰人助者信神聽者直則臧
倉諧言宣尼失職出處語默與時消息則子雲投閣方
回受誣故知天地無心死生同域絃絃品物物有其極
至人者委性循於自然寧任夫智之與力也雖賢愚各

全其好草木不夭其生植已而已而緊不可得

木蘭賦

有序

南唐

徐鉉

頃者鉉左宦江陵官舍數畝委之而去庭樹木蘭因移
植於宗兄之家及鉉徵還席不遑暖又竄於舒庸吾兄
感春物之載華擬古詩而見寄吟翫感歎謹賦以和焉
雖不足繼體物之作庶幾申騷客之情爾

伊庭中之奇樹有木蘭之可悅外爛爛以凝紫內英英
而積雪芬芳兮謝客之囊旖旎兮仙童之節許蒲茸之

竊比聽蘭芽之並列於是辭下土之卑濕歷上京之繁
華耻銜價於豪門乃託根於貧家資幽人之賞豫有好
事之稱嗟一旦逐客程遠君門路賒削閨籍與印組豈
獨留乎此花噫人屢避棄花猶得地分兔苑之餘蔭向
藩房而吐媚投簡多暇攀條屬思持香草以予比效騷
詞而我寄感此生之百憂何斯物之足貴悲夫客館長
吟山城夕陰想馨香之不改歎歡晏之難尋憑歸夢於
飛翼寫商歌於素琴歌曰光景兮愁暮別離兮易久真

宰兮無黨貞心兮不朽誠知異日重滋田氏之荆但恐
相逢共嘆桓公之柳

扶桑賦

唐
朱 鄴

木臨大壑名曰扶桑厭洪波之萬里在青帝之一方受
浩氣以生成那倫衆木挺仙才之秀麗能戴朝陽塵外
風吟天涯雨泣山晴而瑞氣初動海晚而潮痕乍濕幾
千歲月標下界之無雙迴拔榮枯倚高空而獨立霧折
煙融孤光在東長迎旭日先得春風吾將原太極之意

考真宰之功不產奇異安分混同物欲明焉我則與三
才並起田云化矣我則與大朴無窮卓出古今莫逾貞
固當乾坤之上位瞰魚龍之要路至若玉漏聲殘銀蟾
影度收人間之暝色未遍羣山聳海底之紅輪先經此
樹露戢雲驚珠懸皎生雖凌厥熾寧奪茲榮豈若常材
隨大匠之雕刻自如良輔契吾君之聖明巢之者不可
得其窺蠹之者不可得其噬陽烏象擇木之狀晴虹作
挂弓之勢名大天下身高水際掩彩翠於蟠桃病虧盈

於月桂非海也。不足以容其大。非日也。不足以升其高。
葉茂而雲垂。霧景根深而龍撼。驚濤早沃。焦於尺土。微
鄧林以秋毫。巨影倒空。而漠漠寒聲吹夜。以颼颼靈境
難尋。人寰罕測。性欺霜雪。心藏正直。故能齊衆甫而據
滄溟。永佐東君之德。

建木賦

唐閩名

廣都有建木焉。大五千圍。生不知始。高八千尺。仰不見
巔。過雷電遺雲煙。倚白日摩青天。靡蟠桃於度索之上。

毫若木於滄海之邊斯未足奇者天收寸雲日在午位
明白宇宙光皎燭秘枝枝攢太虛外青葉葉積元氣間
翠無一點之影落之於地故自當玉京之要得天下之
中左右仙翁前後玉童潤瑤露颺祥風五雲翼之而斐
疊八景含之而玲瓏帝或自天而降天寧假羽翼帝或
自地而還地不乘虛空以我有飛陸之力以我有太階
之功必我之由忽乎遂通如此見其真宰之意生巨材
而不易上帝之心寄巨材而亦深不然奚至是哉俗人

生代重疊詭譎其或不聞聞之或不信境之絕信之或不
不往往之或不到智之劣自非天付洞微神與明哲樹
杳杳而何在身紛紛而已滅士有以廣都為帝王之宅
以建木為台階之臣自謂未達仰慕斯人髣髴雲霄徘徊
風塵若巨材之一見希謁帝之有因

豫章賦

唐

敬括

東南一方淮海維揚爰有喬木是名豫章根坎窞躐天
網鬱四氣煥三光蟲縮雲聳離披翼張一擢而其秀穎

發七年而其材莫當懿夫倚荆衡連楚越迴合湘沅之
浦芬敷吳會之闕黯彭蠡而煙垂汨滄浪而吹發清輝
豔豔朝灑陽臺之雲翠影亭亭夕皓巫山之月爾其孤
幹直指交莖亂傾紺葉煙綠朱華日明掩莫靈之光價
奪若木之芳榮卉不暇植蔓不及縈總此衆美疇之與
京其下則啼飛猿逐暴武突兀鹿麋爪牙鈎孥盤遊其
下蓋雞勝穀其上則陸鴻漸谷鷺遠孔翠曳曳鸞鵠翩
翩翼翳日聲聞天巢集其顛動盈百千嗟乎不困不輪

有典有則

闕

其材也直空懷寶以自棄諒斤斧

之未識日者龍宮是構鵲觀云修罄山林之木應榱桷
之求何獨不見千金而留為媒紹也闕為出處也幽為
爾不任大為賢而致尤今叢木之所忽吾亦為之心憂
借如將趙括於上軍秩長卿於下令良驥為鹽車所伏
谷松為山苗所映以曼情而等侏儒尚俳優而輕雅正
雖物情之共爾故君子之攸病向若廓君之林池克君
之苑囿膏澤既沐鴻休亦覆門柳不可齋華庭梧不能

獨秀已矣夫用之則哲抑之則沈隨取舍之攸措何棟
梁之所任梓匠之瞻望靡及江潭之歲月空深誰當徒
植天池畔終冀成君桃李陰

散木賦

唐

孫 杲

宵宵冥冥至道之精視之無見聽之無聲伊散木其何
識廼冲用而保生夫其措跡隱深寓形偏寂青嶠右聳
紅溪左闢漱滴瀝之飛泉枕嵌巖之古石將含休以處
順不祈祿而自適故其幹也間柯盤魄蟲穿鳥剝其節

大兮不可以為桶擁腫輪囷抱蠹生津其軸解兮不可
以為輪空心兮若喪拳枝兮不申理不中於規矩才豈
任乎斧斤似支離之有疾固哀駘之入真日者秦構鳳
皇漢營鸚鵡崇臨海之殿豐冠山之閣窮宇內之瓌寶
盡域中之蘅薄雖片善之必收故散木之不作用能以
損之益居貞而悔不恃而成不有而大白雲至止雜蘿
薜以成帷清風來兮協笙竽而吹籟異鵲宵集祥鴛曉
會隱士掛瓢仙人倚蓋不逆於物夫何於害及夫郊暄

淑氣景媚風煙天桃變兮穠李發乍揚芳以競妍既乎
寒露朝變凝霜夜結檣梨剝兮橘柚摧澹無情兮何折
動息無撓榮枯任節道將契於櫻寧德以庶於朗澈與
夫五柞三槐仁賓君子東吳豫章西蜀蕭杞文杏聳於
千尋木蘭香於十里皆蚪蟠鱗接重葩疊葉香靄芊眠
拂日摩天根祗深固表裏巖泉並恃材而喪質咸為名
而天年是知明不若昧語不如默為善者離其道立行
者陰於德社櫟入夢而幾亡野桑因言而自刻豈若聖

知雙遣形神兩忘委不才以居寂任無用以為祥鬱鬱
於純冥之界落落於無何之鄉與天地而長久吸日月
之明光蒙子休聞而嘆曰吾且逍遙其旁

再生檜賦

唐
温岐

檜有再生之瑞天符聖運之興挺松身而鱗皴迴出布
柏葉而杳藹相承隋道既窮則沒身於亂土唐朝將建
故發德於休徵原夫日將興而幽暗皆明君應期而纖
微必表生於枯朽證受命於敗德之時長則繁華示寶

祚於延慶之兆想夫拔陳根而已茂聳修幹以方妍凌
朝而還宜宿露向晚而尤稱新煙以狀而方生蕙之枯
楊若此以理而喻易葉之僵柳昭然效殊祥以示後願
衆瑞而居先嘉其擢本傍榮抽條迴秀歷朱夏而彌盛
冒霜雪而不朽應昌業於龍潛之際豈曰無心彰聖德
於虎視之前孰云虛受徒觀夫戟光紫府效社皇家竦
亭亭之柯葉擢鬱鬱之輝華可以播之於萬古可以流
之於四遐是知歷數歸唐禎祥啟聖何厚地之朽木報

上天之明命殘陽未落宮庭之林藪忽生明月初懸玉
砌之桂華復盛矧夫貞節獨異高標自持散芳氣而微
風乍動入重陰而宿鳥猶疑蓋天所贊也亦神以化之
客有生遇明時身蒙至德窮勝負於朕兆慕休祥於邦
國敢獻賦以揚榮遂布之於翰墨

手植檜賦

元
祝堯

繫孔庭之喬木兮自夫子之文章象三林以毓秀兮開
萬葉以流芳根詩書之正脉兮表吾道之昌長昔闕里

之微言兮稱後凋之松柏惟若木之柏葉松身兮固于
之而不能釋諒因材以栽培兮在人物以如一元氣會
乎其根兮集條理而大成日月拂乎其枝兮揭文明而
上行映尼山之正色兮紛蒼翠之曾敷承泗波之餘澤
兮潤滲漉而不枯雲風歛霍而經庭兮差芳氣之襲予
八音噌吰以砰磕兮忽升堂而驚顧鳳飄颻以銜圖兮
遙千載以來下麒麟有時而出兮或遲茲而游豫彼春
秋之風雨兮超震凌以自揭後七雄之斬艾兮曾不足

動其一髮金石媿乎其堅剛兮縱百秦而何焚神左右
以扶持兮知未喪於斯文吾聞孔壇之杏兮配斯文以
永久何茲檜之鼎峙兮亦茲杏之不朽信聖人之於萬
物兮無一物而不仁苟仁心一有所寓兮自當與天地
而長春建深根而不拔兮屹儒家之柱石今將指天地
為期兮壽皇圖於箕翼北極建杓而秉持兮奎壁燦然
而成行扶桑昭晰以警煜兮條風發乎震方皇覽乎六
藝之芳潤兮熙文運以再昌錄孔氏之子孫兮攬庭秀

而不敢忘訪故家而愛其木兮當百倍乎甘棠命青陽
使發敷兮起朱融使楸鬯戒顛叔以來殺兮警神冥以
葶養謂英才之並育兮待棟梁以為用矧先聖之親植
兮誠有土之所重嗟七十子面承挈提兮各挹材而有
施何梁木之既壞兮余乃不得與茲檜而同時幸壁藏
之亡恙兮瞻墻仞以有基託餘陰以延佇兮結芳條而
遐思衣前後之襜如兮恍洋洋而在斯雖朽質之莫雕
兮亦求柯而為則喜斯道之有依兮遂游歌而不息歌

曰檜之根兮輪囷檜之節兮嶙峋自周及元吾不知其
幾春檜之古兮有神檜之今兮有靈維元繼周益將開
千萬億載之文明

黃楊樹子賦

有序

宋

歐陽修

夷陵山谷間多黃楊樹子江行過絕險處時時從舟中
望見之鬱鬱山際有可愛之色獨念此樹生窮僻不得
依君子封殖倍愛賞而樵夫野老又不知甚惜作小賦
以歌之

若夫漢武之宮叢生五柞景陽之井對植雙桐高秋羽
獵之騎半夜嚴妝之鐘鳳蓋朝拂銀牀暮空固已歲蕤
近日的樂含風婆娑萬戶之側生長深宮之中豈知綠
蘚青苔蒼崖翠壁枝翁鬱以含霧根屈盤而帶石落落
非松亭亭似栢上臨千仞之盤薄下有驚湍之瀆激澗
斷無路林高暝色偏依最險之處獨立無人之跡江已
轉而猶見峯漸回而稍隔嗟乎日薄雲昏煙飛露滴負
勁節以誰賞抱孤心而誰識徒以竇穴風吹陰崖雪積

歎山鳥之嘲哢，裊鷲猿之寂歷，無游女兮長攀，有行人兮暫息。節既晚而愈茂，歲已寒而不易。乃知張騫一見，須移海上之根；陸凱如逢，堪寄隴頭之客。

枸杞賦

有序

宋史子玉

史子分教劍庫之明年，目青踰月，廢卷默坐。客有告之曰：茲土之宜杞，根實繁產，諸泮林尤腴而美。揆之本草，明目養神，盍試其味。尋命僮僕，則取之不竭。食之既厭，而昏者開翳者鮮矣。於是作而歎曰：是物也不假種植。

沾濡雨露芬敷自榮其功效足以回光返照如此况出於輔之翼之長之養之者豈不足以備明時之采擇哉有感而為之賦曰

當春用事肝怙勢而驕厥火彌壯用弗利乎眸紫珍兮塵漫望舒兮雲浮熨之平之濯之冷之計屢施而罔功書既展而復收其誰巧運乎金篦抑將乞諸其龍湫者也客莞爾而笑曰泮宮眈眈靈根萃止匪藻匪芹強名曰杞或云羊乳亦曰狗忌其效伊何未易殫紀於以安

神於以輕體至於瑩秋水之神而爛巖電之光則又其
效驗之細者也子居是間左抽右取不費一錢多取其
數餐厥英還爾明為子之計不亦近而易行乎應之曰
廣文一寒飯啣不足信如子言載采易掬因以此離婁
之目且不負將軍之腹豈不魚熊之兼得又何必空糜
乎廩祿於是叱畦丁戒僕夫搜諸荆棘之場探諸榛莽
之區叢然而遂油然而達或壓枝以駢出或附趾而簪
碧隨取隨足不耘不植蔓延布滿天矯瑰特有如蒙頂

之苗而槍之始露有如楚畹之香而芽之方茁至若仙
杖飛空髣髴驂鸞壽榦通靈時聞吹竽幸則高人逸士
襲其馨而挹其味不幸則樵夫野叟爨之棄而斧之戕
也於是小摘薦至大烹可期錯落琉璃之碎青蔥雨露
之滋潤寒庖之屢空笑盛饌之莫知燎南山之煤罌西
澗之水潔蠲瓦缶酌中火劑登俎過熟噴香霧之蒙茸
舉箸頓空覺餘糝之滑美混甘苦而爽口逼寒涼而液
齒知再飯之幾如陋八珍之鮮味朝馬咀英暮馬茹脆

曾不論乎韭菘又何穀乎蓴豉殆不可無此君於一日
又何拘乎去家之一思惜乎首陽之夫曾采薇而遂足
商巖之老厭噉芝而遂止秦人之炙夫何太俗相如之
渴胡不嗜此哉已而心體舒逸神情爽塏湧真水於玉
池炯夜光於銀海客不予欺遜而謝之荷神農之知音
悵離騷之偶遺雖則一草之微無容多談感物悟理斯
有可觀彼弗種而然矧種之者乎彼弗養而然矧養之
者乎所以菁莪誦育才之樂棫樸歌官人之能行有技

葉可使秀亂苗之去仁在乎熟深懼茅塞子之心維杞
維梓扶而養之一薰一蕕疏而別之自本自根種而茂
之孝弟忠信培而植之師友淵源灌而溉之先王遺言
饜而飫之散柯布葉日積月長摩厲青冥直干霄漢股
肱心膂無施不可如此則劍山之植物豈但收近效於
眸子瞭焉而已哉

朽社賦

有序

晉
張華

高栢橋南大道傍有古槐樹蓋數百年木也余少居近

之後去行路遇之則已朽意有緬然輒為之賦因以言
衰盛之理云爾

伊茲槐之挺植於京路之東隅得託尊於田主據爽塏
以高居垂重陰於道周臨大路之通衢饗春秋之祈報
應豐胙於無射歷漢京之康樂踰喪亂之橫逆朱夏當
陽蒨謁蕭森征夫雲會行旅歸心輜軒停蓋輕輿託陰
吉人向風而祛袂王孫清嘯而啟襟晞甘棠之廣覆福
喬木之無陰

枯樹賦

周庾信

殷仲文風流儒雅海內知名代異時移出為東陽太守
常怱怱不樂顧庭槐而嘆曰此樹婆娑生意盡矣至如
白鹿貞松青牛文梓根抵盤魄山崖表裏桂何事而銷
亡桐何為而半死昔之三河徙植九畹移根開花建始
之殿落實睢陽之園聲含嶰谷曲抱雲門將雛集鳳比
翼巢鴛臨風亭而唳鶴對月峽而吟猿廼有拳曲擁腫
盤坳反覆熊虎顧盼魚龍起伏節豎山連文橫水蹙匠

石鷲視公輸眩目雕鐫始就剝剝仍加平鱗鏟甲落角
摧牙重重碎錦片片真花紛披草樹散亂煙霞若夫松
子古度平仲君遷森梢百頃搓拚千年秦則大夫受職
漢則將軍坐馬莫不苔埋菌壓鳥剝蟲穿或低垂於霜
露或撼頓於風煙東海有白木之廟西河有枯桑之社
北陸以楊葉為闕南陵以梅根作冶小山則叢桂留人
扶風則長松繫馬豈獨城臨細柳之上塞落桃林之下
若乃山河阻絕飄零離別拔本垂淚傷根瀝血火入空

心膏流斷節橫洞口而蔽卧頓山腰而半折文斜者百
圍冰碎理正者千尋瓦裂載瘿銜瘤藏穿抱穴木魅睨
睽山精妖孽况復風雷不感羈旅無歸未能採葛還成
食薇沉淪窮巷蕪沒荆扉既傷搖落彌嗟變衰淮南子
云木葉落長年悲斯之謂矣乃歌曰建章三月火黃河
千里槎若非金谷滿園樹即是河陽一縣花桓大司馬
聞而嘆曰昔年種柳依依漢南今看搖落悽愴江潭樹
猶如此人何以堪

病梨樹賦 有序

唐
盧照鄰

癸酉之歲余臥病於長安光德坊之官舍父老云是鄆陽公主之邑司昔公主未嫁而卒故其邑廢時有處士孫君思邈居之君道洽今古學有數術高談正一則古之蒙莊子深入不二則今之維摩詰及其推步甲子度量乾坤飛煉石之竒洗胃腸之妙則有甘公洛下閎安期先生扁鵲之儔也自云開皇辛酉歲生今年九十二矣詢之鄉里咸云數百歲人矣共語周齊間事歷歷如

眼見以此參之不啻百歲人也然猶視聽不衰神形甚
茂可謂聰明博達不死者矣余年垂強仕則有幽憂之
疾椿菌之性何其遼哉於時天子避暑甘泉邈亦徵詣
行在余獨臥茲邑閑寂無人伏枕十旬閉門三月庭無
衆木唯有病梨一樹圍繞數握高僅盈丈花實頗頽似
不任乎歲寒枝葉零丁纔有意乎朝暮嗟乎同託根於
膏壤俱稟氣於太和而修短不齊榮枯殊質豈賦命之
理得之自然將資生之化有所偏及樹猶如此人何以

堪有感於懷賦之云爾

天象平運方祇廣植挺芳桂於月輪橫扶桑於日域建
木聳靈丘之上蟠桃生巨海之側細葉枝連洪柯條直
齊天地之一指任烏兔之棲息或垂陰萬畝或結子千
年何偏施之雨露何獨厚之風煙愆茲珍木離離幽獨
飛茂實於河陽傳芳名於金谷紫澗稱其殊旨玄光表
其仙族爾生何為零丁若斯無輪奐之可用無棟梁之
可施進無違於斤斧退無競於班倕無庭槐之生意有

巖洞之死枝爾其高纔數仞圍僅盈尺修幹罕雙枯條
每隻葉病多紫花凋少白夕鳥怨其巢危秋蟬悲其翳
窄怯衝飈之搖落忌炎景之臨迫既而地歇蒸霧天收
耀靈西秦明月東井流星顛顛孤影徘徊直形狀金莖
之的的疑石柱之亭亭若夫西海夸父之林南海蚩尤
之樹莫不摩霄拂日藏雲吐霧別有橋邊朽柱天上靈
查年年歲歲無葉無花榮辱兩齊吉凶同軌寧守雌以
外喪不修曝而內否亦猶縱酒高賢佯狂君子為其胞

合置其憂喜生非我生物謂之生死非我死谷神不死
混彭殤於一觀庶筌蹄於茲理

浮查賦

晉庾闡

有幽巖之巨木邈結根乎千仞體洪鈞以秀直挺瓌竒
而特雋冠岑嶺以高棲獨雍容於巖峻混全朴於不才
卓凌霄而絕韻故能紆餘盤肌森蕭顏靡陽飄颻結華
裂水灑遺美賈於翠壁屢懸根於朽壤曳洪波於海湄
鼓長風而飄蕩旦馭波而乘飛潦夕舉浪而赴奔潮吹

雲霧而出洞穴灌炎石而過沃焦江河不俄畧萬里不
一朝

海上孤查賦

唐 獨孤授

滄州一望兮其傷實苦靈查萬里兮越在海浦何遭遇
於聖日獨埋沒於重土島嶼雲深風塵歲古可為萬乘
之器郢匠未斲願作浮海之桴魯人無取不取其材又
無良媒驚沙苦霧激電奔雷根抵折枝條推勢窮兀兮
半隱青樹色蒼茫兮渾生綠苔波濤灌注同汨羅之洲

渚川澤卑濕類長沙之浦隈釣客登頓漁翁往來自然
形變為枯木心成於死灰誰憐在盤根之春當擢幹之
日對上苑臨温室植紫陌以獨秀蔭朱城而未出春風
驟入花霏微而雪下晴煙四斂葉布護而雲密誠以負
大廈之材濟巨川之質何斧斤之為患使形骸而自失
悲夫昔之繁華也如彼今之搖落也如此故知道不常
泰亦不常否物有萬生亦有萬死事既同於糾纏庸詎
識其終始彰周公之聖則大木斯拔表宣帝之興則枯

抑還起君無曰枯查委之泥沙試斲為仙枕薦於公寢
必能夢華胥之神國安蒼生之庶品君無曰散木棄之
溝瀆試剖為犧樽登諸廟門必能縮包茅之醴酒降重
天之渥恩濟美前烈垂芳後昆願君無棄於海上乘以
登天朝至尊

落葉賦

唐
朱 鄴

衆木森沉歲暮秋深日黯黯以斜度風悄悄而亂吟喬
枝邈以架迴墜葉槭以辭林矐彼搖落夫何蕭索形宛

轉而斷連狀徘徊以斜却枝稍高而飛遠條漸踈而陰
薄逗涼空以伴螢繞明月而驚鵲或散漫於原野或搖
颺於樓閣爾其下自幽谷高隕山椒葉何樹而不墜樹
何葉而不凋擁玉砌以初聚值金風而復搖浮於水中
似孤舟之遠泛落於山際若斷雲之已飄悲夫處處園
林紛紛相似覺絕漠之寒至聆洞庭之波起何夏茂而
秋落何先榮而後死葉之致也既順陰陽之宜葉之趣
也誠叶盛衰之理願歸本而猶未嗟微脫而不已別有

寂慮卧幽逸氣無倚聊賞心以遐望乃觸目而增愁見
一葉之已落感四序之驚秋媿體物之逾拙思軋軋而
空抽者也

落葉賦

明
汪偉

大火既沒玉衡回標著微霜於短草振修柯以輕颺丹
鳥行宵以含景玄禽望社而違巢歎百卉之何知亦感
時而早凋於是梧飄金井之牀木落洞庭之浦岸柳江
楓前槐後相碧者為丹堅者為竅望歲蕤兮朝霞聽浙

澀兮夜雨初懸條以猶澀終脫然而別去忽紛沓以爭
先漸悠揚而獨下或既往而獨還或已墜而更舉顛倒
自擲回旋效舞趨遠若避控空如捕逐水迢遞隨風容
與惜連駢而異分歡邂逅而相聚無根蒂以焉託任飄
泊其何所悲興弔楚之騷人詩遞深宮之怨女圓者如
錢銳者如斧剡者如圭平者如楮龍鬪兮摧鱗鳥鍛兮
委羽填溝湮谷浮渠汎渚雖使隸首握籌子房借箸蓋
亦莫之能數也若乃嚴霜之晨皓月之夕深閨懷遠之

婦戍邊思歸之客莫不感之增悲對之太息夢撩亂以
難成思紛糾其如積爰有松柏凌寒不殷表秀色於踈
林揭空標於空山獨心許兮幽人相與同兮歲寒

觀禁中落葉賦

明

李夢陽

飈溲戾以肅肅兮廊宇靜而蕭條覽宮樹之隕零兮哀
貴賤而並凋辭珍柯而永絕兮道回風而吹舉撼金鋪
以撼颯兮排紫闥而求侶為長飈之所接兮倏激響於
青雲襲日月之末耀兮攢玉階而委身譬賤士之利賓

效琛贄而熙載離鄉土而遠適心縈思而搖旆忽兮若
聚儻兮分散儻碩果之見知即萎離其何惋

伐寄生賦

有序

明 劉基

余山居樹羣木嘉果駢植人事錯迕斤斧不修野鳥棲
息冀其上茁異類日夕滋長舊本就悴余覩而悲之乃
募趨捷腰斧鑿升其巔剝條剔根聚其遺而燔之於是
老幹挺立新莢濯如若瘡瘍脫身大姦去國斧鉞之時
用大矣哉作伐寄生賦

天生五材兮資土而成汝獨何為兮附麗以生疣贅蝨
嘍兮枝牽蔓紫瘠人以肥已兮偷以長榮狀似小人之
竊據兮謂城社之可憑觀其陰不庇物材匪中器華不
羞於几筵實不諧於五味來鳥烏之哢聒集蟲豸以刺
蚝果被之而實姜卉蒙之而本悴壇杏無所容其芬芳
甘棠曷能成其蔽芾豈無庸而有害矧眶睫之可置爾
乃建修竿升木末運斤生風以翦以伐脫纏牽於喬竦
落纖蕤之騷屑剝鮮膚以除根毀去毒而刮骨於是巨

蠹既夷新莢載蕃迎春而碧葉雲涵望秋而碩果星繁
信知斧鉞之神用寧能裕盪以生患也耶嗟夫農植嘉
穀惡草是芟物猶如此人何以堪獨不聞夫三桓競爽
魯君如寄田氏厚施姜陳易位大賈入秦伯翳以亡園
謀既售羊化為黃蠹憑木以槁木姦憑國以盜國鬼居
育而人殞梟寄巢而毋食豎冰戒乎履霜豕防其躅
躑諒前轍之昭昭何人心之自惑故曰非其種者鋤而
去之信斯言之可則

伐老柳賦

有序

明 楊守陳

翰林院之後庭有巨柳數章參天蔽日民之輸廩米者
欲暴之庭患柳陰之翳之也請余伐其最巨而尤老者
余不可為之賦曰

吳民輸稅於京郡告於翰林大夫曰吾儕小人供王之
賦殫資竭勞罔敢違誤顧玉粒之含滋恐久儲而紅腐
仰赫日之暴之奈柳陰之周布瞻彼衆柳鬱如車蓋幹
輪囷而離竒根拳曲而軸解惟條葉之輕盈若張緒少

年之可愛時隨風以媚人作妖姬之舞態豈解禁雪霜
之歲寒安可作棟梁而雕繪異松栢之後凋同櫟樗之
徒大胡俾其蟠據乎紫垣掩映乎黃屋倚乾坤之發生
占雨露之濡沐旁惟茂乎棘榛下不秀夫蘭菊既矜翹
而擅榮且裒凶而萃毒巢鳩鴉於其顛孕蟻蝸於其腹
落葉點玉河之清流飛花蠹金毳之上服况其陰影之
連接共浮雲而蔽天晝雖晴而若雨地恒濕而不乾喟
吾米之頻暴尚吐氣如浮煙望廩收其何日徒困苦而

憂煎昔叢竹以蔽庭而剝矣櫻桃以翳廟而伐焉况茲
柳之為害可使其據上地而長年欲盡屏去勢難遽然
敢指其最巨而尤老者請伐而置諸海壖大夫曰此非
吾力之所能為亦豈汝喙之所當議凡物之生貴得其
地故鼠穴社而不熏豺當道而皆避然物盛而衰理所
必至故負擔者極重則顛躋攀者過高斯墜吾恐天渝
於旦夕風與雷其皆厲盡衆柳而拔之併埽六合之陰
翳曦光洞燭於九垓陽德普施於萬類物何暴之不晞

民何欲之不遂惜汝命之未遭徒沈憂而永喟謂余言
其無徵盍姑淹而少竢

蠹木賦

有序

明

鄭 昭

小圃雜植果木間蠹生不暇與治暮春之月衆芳競發
香氣襲人予往翫之或愛其枝葉之茂而忘其心腹之
疾攀而隨折因見蠹蟲在中動以待斃感之作賦

方春發生萬物爭榮既靜觀夫自得亦俯仰而含情涉
後園以適趣愛嘉樹之繁英匪斧斤之斯伐忽根株而

自撥相枝葉之無傷而顛沛之何說細觀厥木外完中
缺豈綠竹之虚心奚脉理之內絕爰有一物暫質素章
娟娟蠹蠹穴於其中殊屈伸而無據若進退之難容居
然就食其名為蠹蟲予於是歎歔悽愴呼兒曹而語之
曰是予之過也草木有生而無知中心受蠹而莫治因
循日久喪其生理予知培其表而不養其裏維實之食
壹至於是廣而言之亦風人之取譬也兒曹曰願卒聞
之
余曰噫嘻凡茲植物品彙不齊叩其性質則有陰陽

堅脆貴賤修短之殊蹊是以神芝仙桂生於絕域長於
天闕根盤九陰香薰日月夏無炎蒸冬無霜雪鬼魅畏
之避不敢越迺若山河之隩五岳之麓倚梧生於朝陽
柏栗聳乎故國文梓則出走青牛貞松則棲息白鹿復
有香生楓柙才美栴檀松子古度平仲君遷周則召伯
所憇漢則將軍坐焉莫不紛披宵露傲睨晨煙風雲颺
颺節勁心堅含聲抱律黛色忝天巢鷓集鳳無慮千年
故東海之廟以白木名西河之社以枯桑稱揚葉闕於

北陸海根治於南陵豫章以之名郡刺桐因之為城是

皆不蠹之木永其壽命而為神人之所憑也次則徙植

河陽移根楚畹菟園縹玉之娛金谷綠珠之選勤與臺

之栽培窮昕夜之鋤畚燥濕是調腹心無沴花實任其

開落春秋忘其近遠若夫孤山淺壤木雖有材風霜摧

折牧豎撼排鳴鴉啁鷓茵壓苔埋徒使存心負節淪沒

蒿萊外戴瘰瘤下拂塵埃桂銷亡而莫惜桐半死而誰

哀至如柑橙橘柚之屬層枝剌剌含液把膏根柢何有

於蟠蚪疾痼端起於秋毫幾微不別至尋斧柯嗟斯木
之受病遂付之無可奈何載觀是蟲初無種類胡為乎
生但有屑木之能曾無聲音之異命與木俱木傾則死
惟人物之理一吾於是乎有取是故妹喜蠹夏妲己蠹
商褒如蠹周官豎蠹於漢唐使三季不蠹女寵則國祚
固未可論漢唐不蠹官豎則天下可至今存於戲天地
之性惟人為貴端厥身心統理萬類逸居飽煖無所猷
為敗家凶國與蠹同歸物有小而戒大事由微而至著

是用擬詞比之風刺

御定歷代賦彙卷一百十七

御定歷代賦彙卷一百十八

草木

竹賦

晉

江適

有嘉生之美竹挺純姿於自然含虛中以象道體圓質
以儀天託宗爽塏列族圃田緣崇嶺帶迴川薄循隰行
平原故能凌驚風茂寒鄉藉堅冰負雪霜振歲蕤扇芬
芳翕幽液以潤本承清露以擢莖拂景雲以容與拊惠

風而迴縈

竹賦

唐

許敬宗

惟脩竹之勁節偉聖賢之留賞覽山經而逖聽詠周詩
而遐想掩寰中而獨秀非庶物之所仰若夫嶰谷著美
稽山見知衛國之稱淇澳梁園之賦夾池山陽之翻密
葉江潭之竦喬枝雖有聞於在昔諒無得而標奇乃徙
植於廣庭爰移根於禁苑亘萸草而界列繞醴泉而右
轉脩幹橫於松徑低枝拂於蘭畹對紫殿之初旭臨

丹樓而向晚望威鳳而來儀佇化龍之為遠爾乃春
光變色夏景開松枝藏戲鳥葉間殘虹上便娟而防
露下檀欒而來風散歸雲之掩翳引落日之玲瓏雖
復嚴霜曉結驚飈夕扇雪覆層臺寒生複殿惟貞心
與勁節隨春冬而不變考衆卉而為言常最高於歷
選

竹賦

唐

吳筠

惟坤靈之播育何備物之實繁偉茲竹之標挺得造

化之清源契道含靈表貞示節葉森散以翠錯莖鮮
脩而瓊潔爾其和風流暢萬彙昭陳揚葩眩其密苑
萋柳藹於通津不郁馥以啓曜但歲蕤而有筠亦未
知為異也至如殺氣凌厲凝霜蕭瑟覽平楚之蒼茫
窺叢林其如失冒冰霜之涸返逾青瑩以鬱密則殊
可重焉故詩曰如苞書稱厥貢猗茲淇園美彼雲夢
昔在軒后肇官陰陽俾伶倫於嶰谷伐脩竹之珍篁
裁六律以協氣調八風而順常然後成竽籥以備樂

其聲濫而彌長笙鏞以間鳥獸蹒蹒諒自然之純粹
曷羣材之可方若乃渭川千畝山陽數林會稽方潤
於碧玉羅浮比色於黃金上點點以雲翳下冷冷而
鳳吟祛赫曦之燠景納淒涼之清陰王子所以嘯詠
稽生為之幽尋召嘉賓及令友暢綠醞與鳴琴美遊
盤之逸趣清寂寞之遠心若乃夾滄江倚丹嶸蓄水
霧之沉沉搖巖煙之漠漠湘妃有揮涕之感楚謠興
防露之作或挺鼓吹之欽釜或垂天門之旁薄皆鸞

鳳之所翔集孔翠之所棲託豈獨嬋娟於廣漢之壤
亦有璀璨於蓬萊之峯結實珠粒敷花紫茸拂皓絮
以飛雪摧紺莖以韻鐘故列仙之攸翫匪吾人之所
從也亦有化雉吳國成龍葛陂容人篋當育蟲桃枝
一笋明其肖嗣三節獲乎嬰兒榮燈纂以感孝茂牕櫺
以表奇篳家壇以塵滅環石牀以陰滋皆靈變之譎怪
良難得而備知爾其衆彙非一則有篳笏筋箋射筒籜
筴籜筍菰蕪之肅轟龍鍾雲母之扶疎箬箭浮色以縹

煥籀籀絳文而繡摠方志之所遺載山經之所闕書安
可得而詳矣靡不勁堅其性葱蒨厥色不規而圓不操
而直故高皇製冠以守位孝文剖符以表職博望侯傳
於大夏之外穆天子樹於玄池之側推此類以彌廣匪
斯文之可極也

竹賦

唐

闕名

總羣籟以擇音歷衆材而簡質惟茲竹之珍勁獨懷貞
而守一若洗文濃露濯影華池離離嘉實冉冉纖枝含

夕氣而拖翠照晨旭以舒猗凌積霜而莫改因虛心而
不虧上橫桂暉下拂松蓋抗修莖於雲表脫輕花於霞
外千仞未極其高十圍寧申其大既絕羣以標傑亦冠
叢而稱最連星影而類珠晚虹掛而猶帶蒙密柔柯布
濩繁葉白日朝映素輪夜接色淨潭深影沉攢疊洎乎
層陰結長飈起清徵奏鳴弦理金壘溢而未傾玉山儼
而猶峙詆訶六籍咀嚼三史窮玄熙之根柢極天地之
終始此乃至人勝集七子碌碌則安齒故語其用也則

五離十折絲剖毫分縈九華於紉扇結雙雉於簞文乍
搖紉袖時拂湘裙掩疑鈿之艷逸籠流麝之氤氳若夫
取象制儀激商流雅圓徵有素清亮非假信鳳鳴之可
習實龍吟而可寫乃曲絕而和微非韻高而調下豈知
分光綺殿散影華軒淡雲霞之遠色霑雨露之餘恩嘉
庭樹之蠲忿跂桃李之無言庶歲寒而無易常耀節於
梁園

竹賦

有序

宋

王炎

小人之情得意則頡頏自高少不得意則摧折不能自
守君子反是竹之操甚有似夫君子者感之作賦以自
箴其辭曰

晦叔讀書南齋之上門巷僻左交游日稀環以桑麻之
場帶以瓜芋之區路折西南萬竹蒼然下緣乎曲澗之
滑其清可以延風月其高可以擾雲霓珊珊乎鳴蒼玉
之佩搖搖乎舒翠鳳之旗森森乎甲冑之雜峙而切切
乎矛戟之參差其偃蹇挫折者如忠臣節士赴患難而

不辭其嬋娟蕭爽者如慈孫孝子侍父祖而不違其挺
拔雄勁者氣毅色嚴又如俠客與勇夫其孤高介特者
格清貌古又如騷人與臞儒予雖朝夕吟嘯於其下曾
無以名其美而狀其奇然泛觀宇宙之中萬物均涵育
於一氣而有剛柔堅脆之不齊榮者必悴盛者必衰實
繁者易剝也麗者早萎惟松柏之有心及竹箭之有筠
足以閱寒暑而貫四時春日載陽山川含滋零露兮宵
潤惠風兮曉披或萼或條或茁或莢含英吐華天天怡

怡竹於是時清而不腴冬日祁寒天地積威雪慘兮冰
堅風饗兮日淒川原千里木脫草枯香盡芳歇掃迹無
遺竹於是時秀而不癯今而後見其含德之有常特操
之不移此吾所以無羨渭川之千畝有取淇澳之猗猗
願定交於金石邀歲寒以為期否泰兮消長剝復兮乘
除秉吾心之堅一視此君乎庶幾

靈丘竹賦

齊

王儉

靈丘深沉蔓竹凝陰神根合拱楨幹百尋振芳條乎崑

岳敷綠采於高岑
泂淮海而蔚映帶
沮漳而蕭森
志東南而擅美
在淇衛而流音
方靈壽而均茂
儀菌桂而成林
若乃青春受謝
九野舒榮
綠蘋齊葉
白芷抽萌
榦抽蔥而特秀
篠擢穎而垂英
霜皦鏡於原隰
木衰踈於郊阡
翠葉與飛雪爭采
貞柯與曾冰競鮮

靈丘竹賦

梁江淹

登崎嶇之碧嶽
入朱宮之瓏玲
臨曲江之迴盪
望南山之蔥青
鬱春華於石岸
赭夏彩於沙汀
遠亘紫林
祕野

近匝玉苑禁垆於是綠筠繞岫翠篁繚嶺參差黛色陸
離紺影上謚謚而留閒下微微而停靖蒙朱霞之丹氣
暖白日之素景故非英非蕊非香非馥而珍跨仙草寶
踰靈木夾池水而檀欒繞園塘而櫛蠹既閒霜而無彫
亦中暑而增肅每冠名於華戎將擅奇於水陸况有朝
雲之館行雨之宮牕崢嶸而綠色戶踟蹰而臨空綺疏
蔽而停日朱簾開而留風被箔簾之窈蔚結篠蕩之溟
濛或產鵝鵲之右或居露寒之東此皆金輿之所出入

瑤輦之所周通

脩竹賦

梁簡文帝

有嫵娟之茂篠寄江上而叢生玉潤桃枝之麗魚腸雲
母之名日映花靡風動枝輕陳王歡舊小堂竹軸今餞
故人亦賦脩竹伊嘉賓之獨劭顧余躬而自慙

脩竹賦

元
趙孟頫

猗猗脩竹不卉不蔓非草非木操挺特以高世姿蕭洒
以拔俗葉深翠羽翰森碧玉孤生太山之阿千畝渭川

之曲來清飈於遠岑娛佳人於空谷觀夫臨曲檻俯清

池色侵雲漢影動連漪蒼雲夏集綠霧朝霏蕭蕭雨沐

裊裊風披露鶴長嘯秋蟬獨嘶金石間作笙竽雜吹若

乃良夜明月窮冬積雪掃石上之陰聽林間之折意參

太古聲沉寥泬耳目為之開滌神情以之怡悅蓋其婉

秀碧梧託友青松蒲柳慚弱桃李羞容歌籊籊於衛女

詠淇澳於國風故子猷吟嘯於其下仲宣息宴乎其中

七賢同調六逸齊蹤良有以也又况鳴嶰谷之鳳化葛

陂之龍者哉至於虛其心實其節貫四時而不改柯易葉則吾以是觀君子之德

慈竹賦

有序

唐
闕名

廣漢山谷有竹名慈生必向內示不離本修莖巨葉攢根杳抵叢之大者或至百千株焉而縈結踰乎咫尺好事君子徙為階庭之翫焉吁嗟非此土所有乃有厭流俗之譏動鄉闕之思者蓋撫高節而興感覽佳名而思歸遂為賦曰

有竹猗猗生於高陂左連瑤帶右雜瓊枝恨幽客之方
賞嗟君侯之不知徒蔚丹谷遷榮綠池氣凜凜而猶在
色蒼蒼而未離屈巖壑之容貌充階庭之羽儀爾其劃
地分域駢陰抗趾疊榦龍迴攢根鳳峙防碧落於霄末
翳紅光於夕始崇柯振而煙靄生繁葉動而風飈起擁
涼砌之晨肅屏炎局之晝滓至若白藏載謝玄英肇切
塞北河堅江南地裂觀衆茂之咸悴驗貞輝之獨潔抽
勁綠以垂霜總嚴青而負雪蓋同類之常稟非殊方之

異節若乃宗生族茂天長地久萬牴爭盤千株競糾如
母子之鈎帶似閨門之悌友恐孤秀而成危每羣居而
自守何美名之天屬而和氣之冥受嗟乎道之存矣物
亦有之不背仁以貪地不藏節以遁時故其貞不自炫
用不見疑保夷險之無易晒榮枯之有期我蓬轉於岷
徼遂萍流於江汜分兄弟於兩鄉隔晨昏於萬里撫貞
容而骨媿伏嘉號而心死庶因感而長懷遂策情而勵
已

慈竹賦

唐喬琳

維竹稱慈幾乎有知九族敦叙孝友威儀是竹必滋五
服相殘骨肉攜離是竹必衰苟自家而刑國亦觸類而
增思萃尊固護檀欒櫛比如束之稠如插之密勁節中
聳攢根內實聲唯夏風影不透日類宗族之親比同朋
友之造膝至若暮歲窮律霜凝雪霏陶鈞無發生之理
松柏有後凋之期是竹也叢篁劈開芽筍怒長紫籜連
披青筠紛上有偕老之情感饋親之養如受制於籬界

不旁侵於土壤雨露之澤謝爾衆芳細葉未吐貞心已
長恥高標而迴出斯裏曲而不揚匪趨時於律候寧隨
韻於笙簧保無用而以道自將愧不才而與物俱昌苟
成陰於隙地作盛景之清涼重曰夫縣縣瓜瓞兮知有
子母邕邕鴻雁兮如次弟兄於家則疏附禦侮於國則
磐石維城田氏不分庭之荆陳家則應天之星莫不鬱
映棠棣急難鶴鷄斯竹也共根連茹一本千莖年深轉
密歲晚彌榮一可以厚骨肉一可以敦友生於靈臺而

莫非信性彰慈孝而感通神靈

慈竹賦

宋 蔡 襄

種植至多強名萬彙物拔其萃茲乃當天地之正氣有
美竹兮特稟夫慈名而榮被豈有懷於本根兮何千竿
翁然而環侍若夫吳郡名園王家新第遠閣斜欄橫塘
靜水或薰風晝來或秋露宵墜日遲留兮簷外陰移人
悽悄兮屏間籟起方且濯峭格而清舉足檀樂之生意
或翹而舉者若堂有高年兮勤素風而講議或亞而側

者若家有令子兮聞話言而沉思悵如出門而事遠遊
兮滋宿雨之清淚雍如奉卮而介眉壽兮暮春煙而怡
醉紫芽蟠聯馨兒季穉去者奔追迎者嬉戲踈者如招
並者如倚雖復貫千狀於巧筆曾莫形其髣髴借如秋
晚霜重兮萬木稜稜而僵悴隴榆盡兮塞月高堤楓丹
兮楚江紫此君也東藍田之苗玉刻炎州之稍翠固節
虛心兮雖大鈞不能奪其志於是揖三荆於堂下結蔓
藟於河漢襲氣同根之豆交驪承萼之棣顧威鳳之時

下亦孝烏之來寄設有用於律筩天聲發兮太和備覩
此芳物悲哉遠人昔我從軍兮南之海濱今我辭家兮
西遊洛塵悵然於舊國舊都感莊生之論恭止乎維桑
與梓諷周傳之陳指白雲兮天遠採幽蘭而露新嗟碧
鮮之得地乃叢茆而相親吾議爾德豈止乎千畝之涓
濱萬石之封君者也

孤竹賦

唐
闕名

有斐君子兮將以自怡藝孤篠於前埤翫以時愜所思

且面陞則陽笑猗猗而處渭向砌則燠祕青青之在淇
問君何事生乎茲嬋娟抱節而無詞借而東南之美會
稽千里阻江阻河所貴則那至乃柯葉不二嗟吁此地
彼其之子賤目貴耳豈知孤者取稀物莫之依含混元
之休氣吸太陽之清暉長則尺準大可寸圍有美遊兮
忘其歸更憶朝霞露未晞懸明月而影短帶疎雨而聲
微觀乎裊娜容與風生其處應知默定洪鐘律幾日能
令童子悟實方就而孤鳳食來枝或成而一龍飛去天

造自然含虛佩堅堅以保名虛以戒盈瞻彼標兮人之
程萬類則改干竿森在其在伊何增永峨峨瞻彼磷兮
不可磨則知天籟奇兮由我起道生一分得我始得之
者非取翫物而已

靜思堂秋竹賦

梁任昉

靜思堂連洞房臨曲沼夾修篁竹宮豐麗於甘泉之右
竹殿弘敞於神嘉之傍綠條發丹檻翠葉映雕梁入房
掃文石傍簷拂象牀常生偶蘭桂結實值鴛鳳逢性與

之至道偶斯文之在茲歡柏梁之有賦恨相如之異時

大明西垣竹賦

唐高無際

嶰谷修篁移植仙堂左聯溫室之樹前對鳳池之芳一
生孤貞四時青蒨不爭麗於夏色不改貞於秋霰保此
歲寒之容得陰宰衡之院露幕塵以珠綴風清冷而響
繁雜金絲於北掖對雲高於西垣曉視含煙朝歸捧日
挺八桂以獨秀與三槐而交密若夫制為用也則笙可
以下鳳皇笛可以奏宮商箏可以播文章管可以調陰

陽信無施而不可若有待而韜光亂日托根勝地兮擢
榦捎雲抱貞節兮葱鬱氤氳若賞七賢之清曠不可一
日無此君也

拂崖篠賦

陳

顧野王

詩詠淇水騷美江干崖憐拂石神貴掃壇既來儀於鳴
鳳亦攸集於翔鸞入翠壁之宵月映沅澧之驚湍帶金
風之爽朗雜玉潤之檀欒陪嘉宴於秋夕等貞節之歲
寒

小簣管賦

元
貢師泰

謂木非喬謂草非繇不蔓而天不葩而條閑庭翳翳密
室脩脩名小簣管有扁之昭或曰子真以簣管為小耶
則仙標出塵直榦凌囂聲諧鳴鳳影挾翔蛟灑清風之
葉葉弄明月之梢梢雖並戶而當軒實拂雲而騰霄子
以植數少為小耶則兩牕三四一徑五六湘實漂黃錦
苞凝綠或開樽而射金或援琴而擊玉雖無千頃之多
聊可數竿而足然則小簣管果何在乎主人曰肩高於

牆斗大於室門可旋履居僅容膝脩及尋丈廣袤咫尺
以溉以種充我餘隙匪谷斯盈匪川斯溢減晉林之七
賢少唐溪之六逸異蔣詡之三徑慕子猷之一日况城
西幽迴堂北愉悅平安之報維昕與晚遺形尚存先德
不遠則又此心之所以思慕而憂惱也質管雖小其義
實大謹葺謹培式萌孝愛或曰唯唯子誠是在虛心有
容直節無懈庶其茂之勿翦勿敗

種竹賦

宋

薛士隆

沔鄂之都牙堂之背久廢弗治汙萊有穢徙脩竹而蒔
焉地不改闢堂不改舊蕭蕭然鬱鬱然不移時而有拂
雲之意矣方其竹之始生自彼空谷頽然而脩猗然而
綠葉秀卿雲雲興翠筠直節虛中羌來細風春生凜冬
森然萬叢及其應人而出樹之庭陞歲蕤之態困頓美
人之春睡灑落之韻謫仙頽乎其尚醉清颺時來振葉
凌柯積翠招搖蕭灑交加夜風冽揭朦朧素月瑣碎兮
清陰橫斜兮錯節吾不知前日之蒼涼與如今之煩熱

也若乃天旻得助繁陰變暑陰之以油雲沐之以時雨
翠幹盤根平安爾所稚子承承方流振古斯又類物之
攸裁固非人之所處也至若淵明之秫潘岳之花好樂
不齊咸宜厥家至人遐觀匪同匪異沈酗清芬各從爾
志則夫是竹之清風斯子猷之遠致也

對青竹賦

有序

宋

黃庭堅

余楚產也閩東南之竹多矣未嘗聞對青竹者也嘉州
僧從之包封見貽藝之而成乃初識之惟範圍之內有

知之物一無窮無知之物一無窮一耳一目不能遍攬也况六合之外者乎感而賦之

竹之美於東南以節不以文也其在楚之西鬱鬱葱葱連山縹雲也會稽之奇材任矢石斬春之澤夏簟蕭笛沅湘淚血邛崃高節慈竹相守孝竹冬茁慈姥嶰谷笙竿篋篁長石之山一節可航猶未極其瑰怪不常也故吳楚無竹工非無竹工婦能織緝之器兒能雞鷲之籠也今夫管篴簫竽榱檣翰藩巴船百丈下漢為筮貴之

則律呂汗簡賤之則箕箒蒸薪惟所逢遭盡於斧斤美
哉斯竹黃質墨章如出杼軸織文自當解甲稅枯金碧
其相歲寒在躬又免斲烹彼其文章之種性不可致詰
剗心而求之不可得剗根而求之不可得匪人匪天有
物有則惟其與蓬蒿共盡而無憾余亦不知白駒之過
隙

感雪竹賦

宋

鄭剛中

鄭子夜半聞風過庭竹細響浙澀寒入茵被光在牕壁

晨興啓戶四顧皓然乃階除之雪積也竹有高出林表
受雪既多壓而低者竿拳曲以屬地葉離披而附枝心
固虛而自若根亦牢而不移然不畏其寒而畏其重頗
見高標困厄之可悲余乃呼童兮假長鏡之巨柄使盡
力兮擊脩篁之凍壓觀負荷兮類積羽之將沉忽奮起
兮信泥塗之可拔色娟娟其可淨節落落以難合寒梢
一伸所謂此君之風流自不可奪也蓋其與蒲柳異質
松柏同條遭玄冥之強梁兮雖抑遏而謾屈分嶰谷之

餘煖兮終櫛蝨而不凋故積累之勢暫可枉其直復還
舊觀則又吟風而飄搖也其在人也初如蔽欺之隔君
子權勢之折忠臣其窘迫而寒冷則夫子之被圍原憲
之居貧也終則如浸潤決去朋黨遽消其氣舒而體閑
則二疏之高引淵明之不復折其腰也雖然雲兮正同
雪兮未止勿袂漉漉之勢孰見猗猗之美在物猶然人
奚不爾亦有窮卧偃蹇於環堵之間者誰其引之使幡
然而起

竹箭有筠賦

唐李程

喻人守禮如竹有筠俾脩己以自守同固本而相因操
持彰於歲暮勤德貴乎日新所以取彼後凋之色戒夫
行道之人將以禦冬且見檀欒而守節比於藏器詎可
須臾而去身若乃清霜翻玄律改彼衆卉之具落同受
氣於真宰何翁茸而自異乃媿娟而有待苟常其性寒
竹何患於時移不易其心志士當懷於道在豈不以和
澤自潤表裏相質竹無筠不能固其節人捨禮曷以法

於時伊先哲之善喻作後代之元龜企於禮者勤而行
之苞本之時已包周身之防疎莖之勢更叶凌雲之期
當其冒霰停霜雪披風靡諒青青而斯在何冉冉而居
彼是知禮之於已如我之徒筠之於竹如我有膚理無
特立義必相須堅剛自持雖貫四時而莫改賞翫不足
奚可一日而或無嗟乎皮之不存何以具其體心之不
固何以謹其禮所以大戴之記足徵相鼠之詩爰啓君
子之道斯其象諸示外以固執中而虛閱寒暑之不變

齊榮辱之所如天損不侵地利空積包綠篠而未改交
翠葉而不易君子察於此者可學禮而受益

湘妃泣竹賦

唐
蔣防

昔帝舜之南巡不迴繫二妃兮心傷已推對三湘之遠
兮積水無際望九疑之作兮愁雲不開鬱丹誠而飲恨
攀綠篠以興哀淚浪浪而千里墮睫竹冉冉而萬點凝
苔斂蛾之怨盈臆如狸之班變色落紅臉而珠影爭圓
染碧纖兮纈文交織天紹嬋娟嗚咽潸然瀝青簡兮丹

書粲粲灑綠枝兮白露漣漣所謂精神達而理歸其著
悲哀集而物謝其堅想夫萬里迎秋重江向夕引蒼翠
以歛歛忍闌干而委積杖卷然之手兩點垂絲揮密爾
之叢衆痕凝碧是知至哀必感有怨必通竹無情而發
外淚有感而從中慷慨成行乍洗龍吟之管爛編遶節
如交鳳食之叢寧類夫聲伯再懷其夢想楊朱徒歎其
西東豈無芳菲渝其霜霰豈無浩淼忘其顧盼是以委
檀欒寄葱蒨來非鼓瑟玉箸之滴瀝雙流去乃望夫粉

籜之淋漓一變懿乎巖巒滿目今古含情事雖遷於歲
月理不昧於堅貞或翦脩竿對潭中而錦落成長簞
施堂上而霞騰豈不以拂水捎雲逾千越萬庶夫知我
者謂我點點而成文不知我者徒曰青青而懷怨

松竹林賦

宋

李知微

步東園之清曉倚藜杖而踐霜感萬木之凋瘁倒枯荷
於野塘披甬徑之荒榛得瞰隰之平岡喚起山林之夢
理幽思之茫茫乃課園丁翦穢鋤荒叢篠蕭蕭野菊煌

煌古柳欲偃寒藤未僵百尋丹楓屹峙其旁靡靡之山
四圍油油之雲相望作峇堯之一亭聊逍遙而徜徉爾
乃訟庭電掃華筵綺張屏金石之轟隆延鄒枚而翱翔
補豐樂之嘉頌賡飛蓋之名章起雄辯於座間快鯨飲
而吞江蕙東征之明月送西盡之夕陽由平易而造理
貴清淨之老莊返樸素於自然除繳繞於申商因人情
之所欲順天道而布常無立的以招敵納斯民於凱康
蔭松竹而讀書期無愧於茲邦

竹花賦

隋

蕭大園

嗟春色之澄明映陽流之澈清花繞樹而競笑鳥徧野
而俱鳴殘陂萍合斜蹊草榮暄條絮滿煖路絲橫游蜂
集而銜蕊戲蝶飛而帶英鶻欲啼而莖歇鴈始去而蘆
生別有葳蕤繡蕩姬娟綵筒縹枝承露紺箬來風漢律
依節月桂臨叢乍影翻於樂沼時名留於瑞宮學應龍
於葛水宿鷗鳳於芳桐洛下七賢相濱二女傾翠蓋之
踟躕汎蓮舟之容與侗儻傲人便嬛笑語拊嫩筍以含

啼顧貞筠而命醕

苦笋賦

宋

黃庭堅

楚道苦笋冠冕兩川甘脆愜當小苦而反成味溫潤續
密多啖而不疾人蓋苦而有味如忠諫之可活國多而
不害如舉士而皆得賢是其鍾江山之秀氣故能深雨
露而避風烟食肴以之開道酒客為之流涎彼桂斑之
夢永又安得與之同年蜀人曰苦笋不可食食之動痼
疾令人萎而瘠予亦未嘗與之言蓋上士不談而喻中

士進則若信退若眩焉下士信耳而不信目其頑不可
鑄李太白曰但得醉中趣勿為醒者傳

御定歷代賦彙卷一百十八

謹案卷一百十七第二十七頁後四行園謀既售
半化為黃刊本園訛圍據明文衡改



總校官庶吉士臣張能照
校對官編修臣周厚轅
騰錄監生臣沈東昇